

## RIJEČ GLAVNOG UREDNIKA

Poštovana akademska i stručna zajednica, čitateljice i čitaoci,

Novi broj časopisa „Uprava” donosi zanimljive naslove koji najvećim dijelom obuhvataju teme iz domena „Državno-pravne” i „Upravno-pravne” naučne oblasti, s tim što određene teme posjeduju i višedisciplinarni karakter, te iz manje istraživanih uglova posmatraju javnu upravu u svom tradicionalnom biću.

Tako, raspon radova ide od historijsko-upravne analize organizacije i upravnog statusa kadiluka Šabac u kojem se daje detaljan pregled ključnih društvenih tokova, organizacije i polažaja te političko-teritorijalne zajednice u širem administrativnom prostoru, pregled institucija vlasti, kao i reformi, podjednako u etabliranim državnim strukturama, kao i onih koje su nastajale shodno promjenama vlasti, prema analizi dva značajna ustavna sistema, Sjedinjenih Američkih Država i Kanade, predstavljajući historijski, politički i pravni kontekst i sadržaj ustavnog uređenja ovih država, uz određenu komparaciju.

U časopisu je načinjen i teorijski pregled značaja i uloge lokalne samouprave, odnosno različiti pristupi vršenju lokalne vlasti, dominantno putem decentralizacije ili dekoncentracije javnih poslova, sa kraćim osvrtom na Bosnu i Hercegovinu. O lokalnoj vlasti diskutuje još jedan rad, ali iz drugačijeg, savremenog i aplikativnog aspekta, elaborirajući o mogućnostima i efektima zaduživanja jedinica lokalne samouprave u Bosni i Hercegovini.

Raspon radova u ovom broju časopisa ide i prema usmjerenijim, upravno-pravnim temama. U jednom od takva dva rada predstavljen je tok upravnog spora, primarno prema pozitivnom pravu u Bosni i Hercegovini, uz određene reformske preporuke, a u drugom radu autori ukazuju na važnost savremenog kontekstualiziranja organizacije i djelovanja uprave u Bosni i Hercegovini putem primjene informaciono-komunikacijskih tehnologija, dajući komentar, uz određene preporuke, strateških i pravnih akata u ovoj oblasti.

Zahvaljujemo se svim autorima na doprinosu. I ovaj put, ističemo orijentaciju časopisa „Uprava” za značajnijim brojem radova na stranim jezicima, naročito na engleskom jeziku, kako bi doprinijeli kvalitetnijoj međunarodnoj prepoznatljivosti časopisa.

Pozivamo autore, akademska lica, kao i stručnjake iz prakse, te mlade istraživače da doprinesu daljem razvoju časopisa, u skladu sa tehničkim

uputstvima, etičkim i naučnim standardima koji su dostupni na web stranici časopisa, u oblasti uprave i mnogobrojnim srodnim naučnim oblastima.

U ime redakcije časopisa „Uprava” srdačno Vas pozdravlja,

Doc.dr Amel Delić,  
glavni urednik časopisa